



# Հովհաննես Թումանյան

## Հայոց լեռներում

Մեր ճամփեն խավար, մեր ճամփեն գիշեր,  
Ու մենք անհատնում  
Էն անլույս մըթնում  
Երկա՛ր դարերով գընում ենք դեպ վեր  
Հայոց լեռներում,  
Դըժար լեռներում:

Տանում ենք հընուց մեր գանձերն անգին,  
Մեր գանձերը ծով,  
Ինչ որ դարերով  
Երկնել է, ծընել մեր խորունկ հոգին  
Հայոց լեռներում,  
Բարձր լեռներում:

Բայց քանի անգամ շեկ անապատի  
Օրդուները սև  
Իրարու ետև  
Եկա՛ն զարկեցին մեր քարվանս ազնիվ  
Հայոց լեռներում,  
Արնոտ լեռներում:

Ու մեր քարվանս շրփոթ, սուկահար,  
Թալանված, ջարդված

Ու հատված-հատված  
Տանում է իրեն վերքերն անհամար  
Հայոց լեռներում,  
Սուգի լեռներում:

Ու մեր աչքերը նայում են կարոտ՝  
Հեռու աստղերին,  
Երկրնքի ծերին,  
Թե ե՞րբ կըբացվի պայծառ առավոտ՝  
Հայոց լեռներում,  
Կանաչ լեռներում:

1902

---